

Alþingi
Erindi nr. P 138/197/
komudagur 6.5.2010

Viðbótarumsögn frá Borgarahreyfingunni vegna frumvarps um stjórnlagabing.

Borgarahreyfingin vill taka undir tillögu Þráins Bertelssonar um skipan utanþingsnefndar til undirbúnings nýrrar stjórnarskrár. Við óttumst að kosning til stjórnlagabings, líkt og frumvarp forsætisráðherra gerir ráð fyrir, muni tæpast skila hæfasta og besta fólkinu þar sem að ólíklegt má teljast að það gefi kost á sér og sé tilbúið til að leggja út í kosningabaráttu. Enn fremur teldum við það mjög óheppilegt ef frambjóðendur myndu setja viss "stefnumál" á oddinn til að höfða til ákveðinna hópa kjósenda.

Gerð nýrrar stjórnarskrár er afar mikilvægur þáttur í sjálfsskoðun og uppbyggingu þjóðfélagsins eftir hrunið og tilvalið tækifæri til að setja í gang umræðu um þær grunnstoðir og gildi sem við viljum sem þjóð miða okkur við. Að því gefnu að tilgangur nefndarinnar sé öðru fremur að skipuleggja fundi víða um land og taka við tillögum frá almenningi, aukast líkur á því að viðtæk sátt náist um tillögur að nýrri stjórnarskrá. Allt starf nefndarinnar þyrfti að fara fram fyrir opnum tjöldum og upplýsingar að vera aðgengilegar öllum þeim sem eftir þeim sæktust.


Að þessu sögðu ítrekum við mikilvægi þess að skipunarbréf nefndarinnar skilgreini hlutverk hennar með því megin markmiði að fá fólk úr öllum þjóðfélagshópum og víðs vegar af landinu til beinnar þátttöku. Enn fremur leggjum við áherslu á að nefndarmenn skuli skipaðir með tilliti til þekkingar og áhuga á viðfangsefninu fremur en að þeir séu fulltrúar ákveðinna hópa eða hagsmuna. Síðast en ekki síst gerum við það að skilyrði að tillaga að nýrri stjórnarskrá fengi ítarlega kynningu og umfjöllun áður en hún yrði lögð fyrir þjóðina í atkvæðagreiðslu, til samþykktar eða synjunar.

Á vegum Borgarahreyfingarinnar hefur verið sett upp heimasíða (*) sem við hvetjum nefndarmenn til að kynna sér. Á síðunni má finna fróðlegar upplýsingar og tilvísanir í greinar og þætti þar sem fjallað er um þetta mikilvæga mál.

Reykjavík, 5. maí, 2010.

Virðingarfyllst,

F.h. stjórnar Borgarahreyfingarinnar.



Sigurður Hr. Sigurðsson,
varaformaður.

* <http://sites.google.com/site/stjornlagathing>